

II. INSTRVCTIO

Ex libris P. M. Inquisitoris P.
Pro formandis processibus, in causis
Bibliotheca P. M. Inquisitoris P.
Strigum, Sortilegiorum, &
maleficiorum.



Leonardi Alese Inquisitoris P. M. Inquisitoris P.
XPERIENTIA rerum Magistra apertè do-
cet, grauissimos quotidie committi errores
in formandis Processibus contrà Striges, siuè
Lamias, & Maleficas in notabile præiudicium
tam' iustitiæ, quàm huiusmodi mulierum in-
quisitarum, ità vt in Sanctæ Romanæ, & Vni-
uersalis Inquisitionis aduersùs hæreticā pra-
uitatem Generali Cōgregatione longo tem-

pore obseruatum fuerit, vix vnquam repertum fuisse aliquem
processum similem rectè, & iuridicè formatum, imò ple-
rumquè necesse fuisse quamplures Iudices reprehendere,
ob indebitas vexationes, inquisitiones, carcerationes, nèc
non diuersos malos, & impertinentes modos habitos in for-
mandis processibus, reis interrogandis, excessiuis torturis infe-
rendis, ità vt quandoquè contigerit iniustas, & iniquas proferri
sententias, etiam vltimi supplicij, siuè traditionis Brachio Sæcu-
lari, & re ipsa compertum est, multos Iudices ità faciles, &
procliues fuisse ob leue, aut minimum inditium credere aliquam
mulierem esse Strigem, & ideò nihil omninò prætermisissè, vt ab
huiusmodi muliere, etiàm modis illicitis talem confessionem,
extorquerent, cùm tot tamèn, tantisque inuerisimilitudinibus,
varietatibus, & contrarietatibus, vt super tali confessione nulla,
aut modica vis fieri posset; Quaproptè vt Iudices de cætero ma-
gis cauti esse possint in conficiendis huiusmodi processibus, in-
frascripta diligentèr, & accuratè præ oculis habeant, & confi-
derent.

Error principalis, & peculiaris omnium ferè Iudicum in hac mate-
ria est deuenire nedùm ad inquisitionem, & carcerationem, sed
sæpè etiàm ad torturà contrà aliquàm mulierè de maleficio im-

putatam, quamvis non constet de corpore delicti siue maleficii, & tamen in iure indubitatum est ad tales actus deueniri minime posse, nisi prius de huiusmodi corpore constet, cum agatur de delicto, cuius vestigia remanent. Corpus autem delicti non dicitur probatum, prout multi Iudices videntur præsupponere ex eo, quod prætenfus maleficiatus sit, vel fuerit infirmus, siue decesserit; Glarum est enim quod infirmitas, & mors regulariter ex maleficio non prouenit: Ideo oportet exquisitas diligentias iudiciales adhibere, examinare Medicos, qui infirmum curarunt, illos diligentè interrogando de qualitate infirmitatis, & an ex arte Medicinæ dignoscere possint infirmitatem esse, vel esse posse naturalem, illos etiam interrogando circa totam seriem, & accidentia ipsius infirmitatis à principio: omnia fusiis in processum redigere ad hoc, ut si forte aliquis medicus per imperitiam (prout multoties euenit) nesciuiisset qualitatem morbi iudicare, & propterea iudicasset non esse naturalem, sed ex maleficio prouenire, alius medicus magis peritus habita notitia omnium accidentium eiusdem infirmitatis, licet infirmum non viderit, possit dignoscere, an talis infirmitas ex morbo naturali, nec ne, prouenire potuerit. Et ulterius maximè congruum esset ad eundem effectum iudicialiter examinare familiares infirmi pro habenda notitia principij infirmitatis, & eius progressus, ex hoc enim apparebit, an conueniant depositiones Medicorum, & familiarium circa accidentia infirmitatis, & sic tutius poterit ferri iudicium à Iudice, an constet de corpore maleficii. Quod si ex huiusmodi diligentijs Iudici apparebit infirmitatem esse, vel fuisse naturalem, procul dubio procedere non debet contra accusatam de tali maleficio: Si verò Medici periti clarè indicauerint esse, vel esse posse probabiliter maleficium, tunc Iudex securius cogitare poterit de inquisitione formanda contra accusatam.

Insuper antequàm Iudex deueniat ad carcerationem prætenfæ Maleficæ, debet diligentè rimari cuncta indicia, quæ sunt contra illam, nequè ex sola denunciatione prætenfæ maleficiati, & eius attinentium, esse facilis ad carcerationem, nisi simul allegetur aliqua probabilis causa, ob quam animus Iudicis rationabiliter moueri possit ad credendum, quod mulier accusata tale maleficium committere voluerit, & eiusdem causæ aliquam probationem, vel saltèm non leue indicium habeat, antequàm ad carcerationem deueniat.

Aduertat præcipuè Iudex in ipso actu carcerationis diligentem facere

cere perquisitionem in domo mulieris inquisitæ, & talem perquisitionem per se ipsum, aut Vicarium idoneum faciat adhibito Notario, ac testibus, nec huiusmodi perquisitioni internueant personæ attinentes, aut familiares prætensi maleficiati, ne contingat, prout aliquandò suspicatum est, dolosè aliqua supponi maleficio denotantia in graue præiudicium Reæ inquisitæ, & in dicta perquisitione annotentur diligentèr per Notarium omnia reperta in domo, & capsis, & non solum quæ possunt iuuare intentionem Fisci, sed etiam, quæ possunt iuuare Ream inquisitam, prout imagines Sanctorum, Corona, diuina Officia, libri deuotionum, Schemata Communionis, aqua, & palma benedictæ, & alia similia, singillatim illa describendo in Inuentario perquisitionis conficiendo. Nec sint faciles Iudices ad firmitèr credendum aliqua reperta, prout oleum in vasculis, pinguedo, pulueres, & similia esse aptata ad maleficio, sed faciant illa considerari à peritis ad effectum, vt dignoscatur, an deferuire possint ad alium finem, quàm maleficij.

Multotiès euenit, quod familiares prætensi maleficiati credentes maleficio, perquirunt intus anaclynterium, ceruical, & puluillos lecti ipsius infirmi, & cum inueniant inuolucra, quæ videntur ad maleficio aptata, illa deferunt ad Iudicem, qui super hoc maximum facit fundamentum ad effectum probandi maleficio, & in hoc debet esse multum vigilans, & circumspèctus Iudex; facile enim euenire potest, vt talia à familiaribus infirmi supposita fuerint, vt sic facilius Iudex inducatur ad credendum maleficio, & ad procedendum contra aliquam personam.

Præterea Iudex benè aduertere debet qualitatem reperorum in huiusmodi lectis, cum enim anaclynteria, & alia præfata conficiantur ex pluma, aut lana, & quotidie intermiscantur, & inuoluantur, dum lectus prosternitur, facile euenire potest, vt spatio alicuius temporis, fiant quædam inuolucra, quæ videantur præferre suspicionem maleficij, & tamèn naturalitèr contingere possunt, ultra quod in actu huiusmodi confectionis anaclynteriorum, & aliorum prædictorum ex incuria Magistri illa fabricantis, aliqua intermisceri potuerunt, ex quibus huiusmodi inuolucra ex se confecta fuerint.

Et ideo si perquirerentur singulorum lecti, præcipuè ex pluma confecti, de facili in aliquibus similia inuolucra reperirentur. Nec etiam est mirum quod in huiusmodi lectis quandoquè reperiantur acus, nam ubi sunt mulieres, acus ubique abundant.

& facile est, quod per accidens spatio alicuius temporis multæ
acus in prædictis mobilibus introcludantur.

Nequè forsan ab re est considerare, Demonem aliquandò talia sup-
ponere potuisse absquè participatione, & assensu alicuius, vt
indè credatur maleficium commissum, & sic aliqua persona in-
debitè damnum patiatur, quemadmodum videmus in actu exor-
cismi nonnullorum obsessorum, qui videntur euomere acus,
clauos, & diuersa inuolucra, quæ tamen impossibile est obsef-
sos in corpore habere, prout non habent, sed Demon in illo actu,
taliam supponit ad os obfessi, vt credatur fortè, obfessum esse ma-
leficiatum, & aliquis indè indebitè molestetur. Ex quibus patet,
quàm circumspectus esse debeat Iudex circà huiusmodi, reperta,
cùm de facili, vel potuerint supponi, vel esse naturalia, vel facta
opera Dæmonis sinè alicuius ministerio.

Consueuerunt (parùm quidè prudentè) multi Exorcistæ iuxta,
non bonam (quo ad hoc) theoricam Flagelli Dæmonum, inter-
rogare Demonem in Exorcismis, quomodò ingressus fuerit cor-
pus obfessi, & an ex maleficio, & quis huiusmodi maleficium cõ-
miserit: Vndè Dæmon Pater mendacij, & inimicus quietis hu-
manæ sæpe respondet, se ingressum esse corpus obfessi ex male-
ficio factò à tali persona, in tali cibo, siue potu, & vt Dæmon ma-
gis certum reddat Exorcistam, & alios de hac re, supponit euo-
menda ab obfesso quædam similia ei rei, in qua dixit maleficium
factum fuisse, & alia pleraquè vt suprà dictum est.

Hinc diuersis vicibus obseruatum fuit, aliquos iudices formare pro-
cessus contra prætenfos maleficos nominatos à Dæmone, vt su-
prà, tanquàm si ex dicto Dæmonis probentur præmissa: Vndè
super huiusmodi processibus nulla vis facta fuit à Sacra Con-
gregatione, imò semper repræhensi fuerunt Exorcistæ, Dæmonē
vt suprà interrogantes, & Iudices, qui super Dæmonis respon-
sione processum formarunt.

Aliqui iudices opinantur (& perperam quidè) quod eo ipso, quod
aliquis reperitur obfessus, id ex maleficio prouenerit, & ex hoc
solo iniuste formant processus contra personas aliquo modo ob-
fessis infensas, vel aliundè indiciatas. Hoc est maximè absurdū;
Cui enim dubiū est, quod sinè maleficio ex permissione Dei po-
test Dæmon vexare corpus alicuius? Caueant itaque omnino Iu-
dices, ne ex sola obfessione Dæmonis, conficiant processus super
maleficio, imò etiā sint cauti ne decipiantur ab aliquibus, qui
in præmissis imposturam committunt, & diuersimodè se obsef-
sos esse simulant, sæpè enim huiusmodi impostores reperiuntur.

Non

Non sint faciles Iudices ad faciendum magnam vim contra aliquam personam vti Strigem, & maleficam ex indicio fame, quamvis enim alias fame indicium sit magni momenti, attamen in ista materia ob odium comune, quod habetur in Striges, contra quas omnes unanimiter clamant, facillime insurgit huiusmodi fama contra aliquam mulierem, præcipue quando est Vetula, & turpis formæ; Unde vel modicum fundamentum super tali fama fiat, vel saltim diligens Iudex interroget Testes, à quâto tempore ortum habuerit, & à quibus, & à qua occasione: Hinc enim forsitan sæpè ex processu apparebit, famam esse indicium modici momenti.

Uterius aduertendum est, quemadmodum mulierum genus est maxime superstitiosum, & fortilegijs præcipue amatorijs deditum, nõ tamèn sequi, quod si aliqua mulier fortilegia, & incantationes, vel ad sananda maleficia, vel ad cogendam voluntatem hominum, vel ad alium quemcumque finem fecerit, ergo est strix formalis; potest enim esse fortilegium sine apostasia formali ad Dæmonem, licet non careat suspitione apostasie vel leui, vel vehementi iuxta qualitatem fortilegiorum adnotatam in c. accusatus §. sanè de hæret, in sexto, & ideò bonus Iudex dum format processum contra aliquam mulierem confessam, vel conuictam de huiusmodi fortilegijs, non sit facilis ad concipiendum in animo suo, quod sit apostata formalis ad Dæmonem, licet hoc esse possit, sed quando deueniet ad torturam contra hanc mulierem, illam in genere interroget. an habuerit aliquod pactum cum Dæmone iuxta ea, quæ inferius dicentur circa modum torquendi: & ad hoc maxime aduertere debent Iudices, quia multi in hoc decipiuntur, falsò putantes, quod huiusmodi fortilegia fieri non possint sine apostasia formali ad Dæmonem, & hinc oriuntur maxima præiudicia mulieribus inquisitis de huiusmodi fortilegijs; Iudices enim minus periti, vel alias nimis faciles (ob lecturam aliquando librorum de fortilegijs, & Strigibus tractatum) falso præsupposito decepti, nullam viam relinquunt, etiam indebitam, pro extorquenda confessione mulierum, quæ sæpissimè ob diuersos malos, & illicitos modos habitos, tandem inducuntur ad fatendum ea, quæ nunquam cogitarunt.

Vt autem vitentur huiusmodi mali modi, ad infra-scripta attendant diligenter iusti Iudices.

In primis (quatenus fieri potest) non permittant mulierem carceratam ob maleficium, aut fortilegium, quempiam alloqui, & si plures reperiuntur mulieres carceratæ in materia præmissa, non permittant simul alloqui, sed retineantur in carceribus separatis, quia sæpè multi conueniunt falsum fateri contra se ipsas in materia apostasie,

fiat, putantes hac via citius à carceribus eximi.

Nulla modo curent, neque permittant Iudices, quod custos carceris, aut quisvis alius ille sit, mulieribus sic carceratis suadeat quid fateri debeant cum examinatae fuerint, multoties enim compertum est, quod mulieres huiusmodi suasionibus impulsæ, aut etiam spe impunitatis promissæ (quæ tamèn nunquàm eis promitti debet) fassæ fuerunt id, quod nèc etiam somniarunt.

Iudices nunquàm alloquantur huiusmodi mulieres carceratas, circa merita causæ, nisi iudicialitèr eas examinando.

Nullas suggestiones in illis interrogandis omninò faciant, sed ab initio interrogentur, An sciant, vel præsumant causam examinis, seu carcerationis, deindè de inimicis, & de causis inimicitiarum, postea possunt interrogari de cursu vitæ suæ, de frequèntatione Sacramentorum, quis fuerit earum Confessarius, & de alijs similibus, ex quibus detegi possit bona, vel mala earum vita, & conditio: Deindè in genere possunt interrogari, An sciant aliquod sortilegium, & ad quem effectum, & an vnquàm huiusmodi, aut aliud sortilegiũ executioni demandauerint, & si negauerint, possunt fieri alia interrogatoria in genere, paulatim eis obijciendo, quod deponitur in processu eas scire, aut commisisse tale, & tale sortilegium; Et tandèm si omnia negent, possunt eis in diuersis interrogatorijs paulatim obijci, quæ in processu contrà illas habentur, circumscriptis tamèn nominibus, & cognominibus testium, & circumstantijs, ex quibus ad notitiam deuenire possint, qui sint testes, & tandèm completo processu informatiuo, si adhuc persistant in negatiua, erunt repetendi testes processus offensiu, quæ repetitio vt validè, & legalitèr fiat, formandi prius sunt articuli pro parte fisci super capitibus, quæ pro fisco prætenduntur, & copia dictorum articulorum danda ipsis inquisitis, assignando eis Aduocatum, & Procuratorem idoneum, etiam ex officio, quatenus Inquisitæ, vel ob paupertatem, vel alia, de causa illos non habeant, eisdemque tempus congruum detur ad dandum interrogatoria, quo elapso, fiat repetitio; Facta repetitione detur eisdem terminus ad faciendas defensiones, deturquè copia processus, & factis defensionibus, seu lapso termino ad illas faciendas Iudices conuocent cōgregationem Consultorum peritorum, in qua per extensum processus legatur, suppressis nominibus, & cognominibus, & circumstantijs, & si de modo expeditionis causæ non sint concordēs, aut causa sit grauis, vel ratione delicti, vel ratione personæ, non deueniatur ad torturam, nisi consultata Sacra Congregatione ad quam mitti debeat copia integr processus tam offensiu, quàm defensiu, & quando videretur Iudi-

cibus cum voto sua Congregationis, sine difficultate ad torturam deueniri posse, quia iudicia essent urgentia, aduertatur, ne in ipsa tortura interrogentur inquisiti de delicto in specie, quod præten- ditur, sed tantum antequam deueniatur ad decretum torture, obij- ciantur eis iterum iudicia, quæ in processu habentur, & postea in actu torture interrogentur tantum, vt dicant veritatem de ijs, super quibus fuerant interrogati, & si fateri coeperint, non suggeratur eis aliquid, sed tantum recipiantur, & scribantur verba præcisa earum confessionis, interrogando postea in genere super ulteriori veritate. Aduertatur, ne tortura detur, cum squassis, aut cum aliquo pondere, siue baculo ad pedes, sed sit simplex eleuatio in torturam funis, aut sit simplex tortura alterius generis tormentorum, quatenus tor- mento funis torqueri non possint.

Non sint inuociles Iudices ad repetitionem torture, nisi causa sit grauif- sima, quoniam casu iam erit consulenda Sacra Congregatio, vt di- ctum est.

Nullo modo abradantur aliqui pili, aut capilli ipsarum mulierum, nec vim faciant Iudices contra inquisitas in quodam indicio ab aliqui- bus Doctoribus, considerato, videlicet quando fortasse huiusmodi mulieres (maximè in tortura) non emittunt lachrymas.

Tortura nunquam excedat tempus vnius horæ, nec de facili per horâ tortura inferatur, nisi stante grauitate causæ, & urgentibus indicijs simul, & in fine examinis annotetur tempus, quo in tormento man- serunt.

Maximè est aduertendum, quod in euentum, in quem huiusmodi mu- lieres apostasiam ad Dæmonem, & accessum ad ludos diabolicos fa- terentur (quo casu corpus delicti aliunde probari non potest, quàm per propriam confessionem) curandum est sine minima suggestione, vt huiusmodi mulieres totam seriem facti à semetipsis recenseant, & quomodo ab initio ad id inductæ fuerint, de tempore, & alijs cir- cumstantijs, nam hoc modo videri poterit an confessio huiusmodi apostasie, & accessus ad ludos, verisimilis sit, nec ne, & casu, quo fateantur aliqua particularia, siue circumstantias, quæ sint verifica- bilia, omnino Iudices diligentias faciant pro ijs verificandis, quia sic magis verisimiles reddentur confessiones circa apostasiam, & ac- cessus ad ludos, aliàs si tales circumstantiæ adductæ falsæ compe- riantur, dubitari posset de veritate huiusmodi confessionis forsàn secutæ, vel vi torture, quæ est remedium fallax, vel suggestionem ali- cuius, vel tædio carceris, vel quia sic crederent facilius ipsis indul- gendum esse, prout aliquando compertum est, diuersis istis respe- ctibus, mulieres falsò fassas esse apostasiam, & accessus ad præfatos ludos.

ludos: Et vt facilius Iudices possint se abstinere à quacumque suggestionē, quando mulieres incipiunt fateri talem apostasiam, forsā melius esset, vt tūc Iudices obliuiscerentur eorum, quæ dicūt Doctores in ista materia, quia sæpē visum est, quod Iudices in ordine ad ea, quæ perlegerunt penēs Doctores, multa præiudicia faciunt his mulieribus.

Et quatenus tales mulieres fateantur apostasiam, & accessus ad ludos, & nominēt complices in huiusmodi ludis, nullo modo procedatur cōtrā huiusmodi complices, quia cū talis accessus plerumquē per illusionem contingere possit; iustitia non postulat, quod contrā cōplices cognitos, & viros, per illusionem procedatur.

Omninō Iudices scribere faciant in processu inrerrogatoria omnia per extensum ab ipsis Iudicibus facta, vt ex lectura processus appareat qualia illa fuerint, & an adsint suggestiones, cū maximo enim, abusu, & præiudicio consueuerunt aliqui Iudices scribi facere, Ad opportunam interrogationem Respondit, seū aliās Respondit.

Multi Iudices deueniunt ad formandum processus, nec colligitur ex processu, quale fuerit primum indicium, & vnde prouenerit; sed processus sic incipiunt; Cū ad aures deuenit, seū aliās; Præcedente fama publica &c. Caueant igitur Iudices ab isto errore; & semper examinent in principio processus personam, seū personas, quæ ad aures primò aliquid dixerunt, vel quomodò talis fama ad eius notitiam peruenerit, & cuncta seriatim in processum redigant, ita vt nihil omnino omittatur.

Plerumque contingere potest, quod Infantes decedant ex suffocatione in lectis pauperum Matrum, & Nutricum, & ob id prohibetur Matribus, & Nutricibus, ne in earum lectis, sed in cunabulis separatis infantes retineant; ideò prudentes iudices benè aduertant, quia secuta aliquādò simili suffocatione, ne illa detegatur, Matres, siue Nutrices propalant, infantes occisos à Strigibus.

In huiusmodi causis, & processibus formandis omninō seruentur Taxæ aliās transmissæ de mandato Sacræ Congregationis, & quando mulieres præcipuē sunt pauperes, caueant Iudices ab earum bonorum expilatione.

ROMAE, Ex Typographia Reu. Cam. Apost. MDCLVII.

SVPERIORVM PERMISSV.

